

四庫全書

經部

欽定四庫全書

古微書卷三十五

明 孫穀 編

雜書緯

漢儒傳洪範以初一五行六十五字徑為洛書本文既有本文又何云戴履肩足白文二十五黑文二十也雖然緯書若出漢世者便應演洪範之文而語不及範固知出春秋季世矣今讀其文大類

識詞豈河圖主緯洛主識耶

雜書靈准聽

所述多太古溟滓以上故言其幽靈忽恍不可為象而但溢于聽謂聽之以氣也非聲也

洛水者地理陰精之官帝王明聖龜書出文天以與命地以授瑞接河合際居中護羣王道和洽吐圖神逆名亂教摘亡弔存故聖人觀河洛也

按乾坤鑿度孔子曰帝德之應洛水先溫九日後五

日變為五色玄黃天地之靜書見矣負圖出午聖人  
見五日以五日見十日以十日見十五日以十五日  
見二十日以二十日見二十五日以二十五日見三  
十日以三十日又曰帝王始起河洛龍馬皆察其首  
蛇亦然其首黑者人正其首白者地正其首赤者天  
正謹其人生之甲乙丙丁戊己庚辛壬癸各居應其  
國中以動靜逆順此天地神靈佐助之期吉凶之應

注各居其國者若甲為齊乙為東夷王者起於此國中龍則用其卦日蛇則用其卦月動謂河洛水靜謂

陵陸地各如其迹也

氣五機七八合提九爻結八九七十二錄圖起

鄭玄注曰氣五

寓之五行機七二十七里也二十八宿以存焉二者用事以卦相提得一歲俱終而太一行九宮及位遊相結每官如卦之日則參差矣八九相乘七十二歲而七百二十歲復於冬至甲子主象其數以為軌焉故曰錄圖起之

按乾坤鑿度欲求水旱之厄以位入軌年數除軌箭盡則厄所遭也甲乙為飢丙丁為旱戊己為中興庚辛為兵壬癸為水卧箕為年立箕為日必除先入軌

年數水旱兵饑得矣如是乃救災度厄扶陽之法

天皇頎羸三舌驤首鱗身碧盧禿揭地皇十一君皆女  
面龍額馬踈蛇身人皇龍身九頭驤首達腋地皇氏逸  
于有人皇九男相像其身九章 相厥山川形成勢集  
才為九州謂之九圍 人皇出於地提之國兄弟相似  
別長九州已居中州以制八輔

人皇氏駕六提羽乘雲祇車 人皇別長九州離艮地  
精生女為后夫婦之道始此

厲山氏產山谷分布元氣蓋即烈山氏

按洞神經天皇氏以獲為名以望為姓字子潤地皇  
姓鑑名嶽字子元人皇姓愷名胡洮字文生 項竣

始學篇天地立有天皇十三頭號曰天靈治萬八千  
歲以木德王地皇十二頭治萬八千歲人皇九頭兄  
弟各三千三百歲依山川土地之勢裁度為九州各  
居一方因是而區別

皇道缺故帝者興

赤帝之為人視之豐長八尺七寸豐下允上龍顏日角  
八采三眸烏庭荷勝琦表射出握嘉履翌寢息洞通

舜長九尺太上員首龍顏日衡方庭甚口面頤亡髦懷  
珠握褒形卷婁色驚露目童重曜故曰舜而原曰重華  
禹身長九尺有六虎鼻河目齟齒鳥啄耳三扇戴成鈐  
襄玉斗玉盭履已

有人方面日衡重華

衡有骨表如日也眉  
上曰衡重華重童子

握石椎懷神

珠

推讀錘錘平輕重也握謂知玉  
衡之道懷神珠喻有聖性也

璿璣玉衡以齊七政



歷象日月星辰正月上日舜受終鳳皇儀黃龍感朱草

生莫莢孳西王母授益地圖

西王母得益地之圖來獻

有人

謂禹也

大口兩耳參扁足文履已

漏空也戊巳土之日故當年水土故

以為名也

首戴鈎鈴

有骨表如鈎鈴

胸懷玉斗

懷旋璣玉衡之道或以為有黑子如玉斗

也

有人出石夷掘地代戴成鈐懷玉斗

按拾遺記禹鑿龍闕之山亦謂之龍門至一空巖深

數十里幽暗不可復行禹乃負火而進有獸狀如豕

銜夜明之珠其光如燭又有青犬行吠於前禹計可  
十里迷於晝夜既覺漸明見向來豕犬變為人形皆  
著玄衣又見一神蛇身人面禹因與語神即示禹八  
卦之圖列於金板之上又有八神侍側禹曰華胥生  
聖子是汝耶答曰華胥是九河神女以生余也乃探  
玉簡授禹長一尺二寸以合十二時之數使量度天  
地禹即持執此簡以平定水土蛇身之神即羲皇也  
賁居曰自混沌盤古氏為一開闢伏羲氏為再開

闢至大禹為開闢之三矣故雜書汲汲推大禹云

又按乾坤鑿度孔子曰復表日角

表者人形體之章表也名復者初震

反也震之體在卯日始出馬又初應在六四於辰在丑為牛牛有角復人表象

臨表龍顏名

者二爻而五體震震為龍應在六五五六五離爻也體南方為上故臨人表在顏也

泰表載干

干楯也名泰者二爻也而體艮艮為山山為石體有以行懼難之器云應在上六于人體俱須參人表載

於干上也大壯表握訴龍角大辰

艮卦至大壯而立體此為乾其四則艮爻耳艮

為手握訴者艮也并二則坎為水有脣詩云實之河之脣四名卦而震為龍故大壯人之表其象也

夬

表斗骨履文

名夬者五立於辰在斗魁所指又五於人體當艮卦於文亦手體成其四則震

亥也為足其三猶艮爻於十千次值木於躔七曜之行趨焉七者屬爻此斗在骨足履文大人之表象明也  
**姤表耳參漏足履王知多權**  
姤初爻在巽巽風風為聲而無形也九竅

之分目視形耳聽聲人聲屬坎坎為水水為孔穴象消卦其道五事白聽耳而三漏聽之至巽為服初爻最在下足象消卦其姤離為明人君南面而治焉足行于其上姤人表覆王是繇然主人君最尊者離又為大大者土寄位焉土數五當如姤氣于其上故八兼更得性耳巽為進退又為近利有知即以進退求利此謂之姤焉者陰氣**遯表日角連理**  
名遯者以離之始故因其表見其情  
消卦遯主六月於辰未未為遂有角離南方之卦也五均南方為衡人之遇土曰衡衡者平地連理或謂連珠者其骨起衡之遯人表亦少然  
**否表二好文**  
詩含神霧云四角主張熒惑司過也

細或為之時名否卦者三也三在五體艮之中艮為木多節否人之表二時象之與三艮卦體五坤坤為文故性亦好文也

觀表出準虎

名觀者亦在五艮之中而位上辰為山澤山通氣其于人

體則鼻也艮又門闕觀謂之闕準在鼻上而高顯觀人表出之象艮為禽喙之屬而當兌之上兌為口虎

唇又

象馬剝表重瞳明歷元

名剝者五色也五離爻離為目瞳目子六五于辰又在卯

卯酉屬也剝離人表重馬五月卦體在艮終萬物始萬物莫感乎艮歷數以有終始剝人煎之性自然表象參差神實為之難得縷耳所聞差此皆律歷運期栢一匡之神也欲

所按合誠

主正月不三者此人心之合誠春秋識卷名也

賁居曰自古論形相未有參以卦象者此道精眇

矣故述其大端若斯

黑帝子湯長八尺一寸或曰七尺連味庭臂二肘湯背  
有四肘在毫能修其德東至於洛觀帝堯之壇沉璧退  
立黃魚雙踴黑烏隨魚止于壇化為黑玉又有黑龜並  
赤文成字言夏桀無道湯當代之禱杙之神見于邳山  
有神牽白狼銜鉤而入商朝金德將盛銀自山溢湯將  
奉天命放桀夢及天而錫之遂有天下

按周書殷祝解湯將放桀于中野士民聞湯在野皆

委貨扶老攜幼奔國中虛桀請湯曰國所以為國者  
以有家家所以為家者以有人也今國無家無人矣  
君有人請致國君之有也湯曰否昔大帝作道明教  
士民今君王滅道殘政士民惑矣吾為王明之士民  
復致於桀曰以薄之居濟民之賤何必君更桀與其  
屬五百人南徙千里止於不齊民往奔湯於中野桀  
復請湯言君之有也湯曰否我為君王明之士民復  
重請之桀與其屬五百人徙於魯魯士民復奔湯桀

又曰國君明之士民復奔湯桀又曰國君之有也吾則外人有言彼以吾道是耶我將為之湯曰此君王之土也君王之民也委之何湯不能止桀湯曰欲從者從君桀與其屬五百人去湯放桀而復薄三千諸侯大會湯退再拜從諸侯之位湯曰此天子位有道者可以處之天子非一家之有也有道者之有也故天下者唯有道者理之唯有道者紀之唯有道者宜久處之湯以此讓三千諸侯莫敢即位然後湯即天



子之位與諸侯誓曰陰勝陽即謂之變而天弗施雌  
勝雄即謂之亂而人弗行故諸侯之治政在諸侯之  
大夫治與從

湯之事罕有聞者以其匿汲冢書中輒為標出

有人雄起戴玉英析旦失籥亡其金虎東南紛紛又精  
起昌光出軫已圖之

有鳳凰銜書游文王之都書文曰殷帝無道虐亂天下  
皇命已移不得復久靈祗遠離百神吹去五星聚房昭

理四海

按國語惠王十五年有神降於莘內史過曰昔夏之興也祝融降於崇山其亡也回祿信於黔隧商之興也禱杙次於丕山其亡也夷羊在牧周之興也鷩鷩鳴於岐山其衰也杜伯射王於鄆王曰今是何神也對曰昔昭王娶於房曰房后實有爽德協於丹朱丹朱馮身以儀之生穆王焉實臨照周之子孫而禍福之若繇是觀之其丹朱乎

賁居曰明神之降若此其赫也而又有匿形聞聲  
盡日交人者如吳太主時羅陽縣有神自稱王表  
周旋民間語言飲食與人無異然不見其形又有  
一婢名紉吳主遣李崇齋印綬迎表表隨崇俱出  
及所在郡守令長談論所歷山川輒遣婢與其神  
相聞崇與表至權於蒼龍門外為立第舍數使近  
臣齋酒食往表說水旱小事往往有驗 噫史冊  
所記之神恠莫著於是矣丹朱之為穆王遂增出

後世輪迴功案其說紛多

蒼帝姪昌日角鳥鼻身長八尺二寸聖智慈理以成草木之長而順天時水澤不內舟以成魚鱉之長不麋不卵以成鳥獸之長畋獵唯時不殺童羊不夭胎童牛不服童馬不馳不騫澤不行害土不失其宜萬物不失其性天下不失其時

文王獨坐屏去左右深念遠慮召太公望曰帝王猛暴無文強梁好武侵凌諸侯苦勞天下百姓之怨心生矣

其灾予奚行而得免於無道乎太公曰因其所為但興其化上知天道中知人事下知地理乃可以有國焉

武王伐紂度孟津中流白魚躍入王舟王俯取魚長三尺目下有赤文成字言紂可伐王寫以世字魚文消燔魚以告天有火自天止于王屋流為赤烏烏銜穀焉穀者紀后稷之德火者燔魚以告天天火流下應以吉也遂東伐紂勝於牧野兵不血刃而天下歸之

按仁王經世間帝王有其五種一粟散王威德最劣

二鐵輪王治閻浮提三銅輪王兼二天下四銀輪王  
化三天下五金輪王統四天下

廣弘明集云此之五王論其位上下不同語其德勝  
劣有異推秦皇漢武閻浮提內唯王震旦五種王中  
粟散王也

蒼帝起天雨粟

有白雲出自蒼梧入於大梁

有氣象人青衣無手在日西天子之氣象也

蒼帝起青雲扶日赤帝起赤雲扶日黃帝起黃雲扶日  
白帝起白雲扶日

按晉志天子氣內赤外黃四方所發之處當有主者  
若天子欲有遊往處其地亦先發此氣或如城門隱  
隱在氣霧中恒帶殺氣森森然或如華蓋在氣霧中  
或氣象青衣人無手在日西或如龍馬或雜色鬱鬱  
衝天者此皆帝王氣

太白守心後九年大饑禁感守心逆臣起

按天官書太白白比狼赤比心黃比參左肩蒼比參  
右肩黑比奎大星亢為䟽廟太白廟也太白大臣也  
其號上公熒惑從太白軍憂離之軍却其入守犯太  
微軒轅營室主命惡之心為明堂熒惑廟也謹候此  
王者不藏金玉則紫玉見之深山服飾不踰祭服則玉  
英出

靈龜者玄文五色神靈之精也上員法天下方法地能  
見存亡明於吉凶王者不偏黨尊者老則出



按爾雅一曰神龜二曰靈龜三曰攝龜四曰寶龜五  
曰文龜六曰筮龜七曰山龜八曰澤龜九曰水龜十  
曰火龜周禮鄭玄注六龜之屬天龜玄地龜黃東龜  
青西龜白南龜赤北龜黑龜俯者靈仰者繹前弇果  
後弇獵左倪靈右倪若是其體也東龜南龜長前後  
在陽象經也西龜北龜長左右在陰象緯也天龜俯  
地龜仰東龜前南龜卻西龜左北龜右各從其耦  
比讀褚先生傳龜名又異一曰北斗龜二曰南辰龜

三曰五星龜四曰八風龜五曰二十八宿龜六曰日月龜七曰九州龜八曰玉龜凡八名龜圖各有文在腹下文云云者此某之龜也記曰能得名龜者財物歸之家必大富至千萬宋元王之得龜也孔子聞之曰神龜知吉凶而骨直空枯日為德而君於天下辱於三足之烏月為刑而相佐見食於蝦蟇蝟辱於鵲騰蛇之神而殆於即且竹外有節理中直空虛松柏為百木長而守門閭日辰不全故有孤虛黃金有

疵白玉有瑕事有所疾亦有所徐物有所拘亦有所據罔有所數亦有所踈人有所貴亦有所不如何可而適乎物安可全乎天尚不全故世為屋不成三五而陳之以應之天天下有階物不全乃生也又卜禁日子亥成不可以卜及殺龜日中如食巳卜暮昏龜之徵也不可以卜庚辛可以殺及以鑽之常以日旦被龜先以清水澡之以卯被之乃持龜而遂之若嘗以為祖人若已卜不中皆被之卯東向立灼以荆若

剛木土卯指之者三持龜以卯周環之祝曰今日吉  
謹以梁卯煇黃板去玉靈之不祥玉靈必信以成知  
萬事之情辨兆皆可占不信不誠則燒玉靈揚其灰  
以徵後龜其卜必北向龜甲必尺寸

賁居曰自夫子贊易者重而龜不傳矣祿生補此  
猶上古墨灼之遺法歟即以為卜經亦可

鰓鰓魚狀如鵲食之不瘳出涿光之山

按山海經諸鳥食之有益人者黃鳥不如鳩宜子盤

鵠已渴鷓鴣無卧肥遺已癘雷櫟已痔數斯已癭鬻

已腹痛又已痢鷓鴣不饑馱已墊素豈不畏鷓鴣不

魘當扈不眴

目眩也

白鵠已噬痛又已痢鳩渠已曝

皮皴

起也鷓鴣馱餘俱辟火寓辟兵青耕辟疫 諸獸食之

有益者狂狂善走類不妬九尾狐不蠱天狗已瘳耳

鼠不眴

腹脹也

螫蚘不眴獐不風搏訖不畏

謹天狗

俱禦凶臃疏辟火羶羊脂傅之已腊

體皴

諸魚食之

有益者鮭無腫鯈無蠱又不癡赤鱖已疥文鯨已狂

冉遺不昧鱸滑鱗俱已疣何羅已癰修辟已白癬儻  
已憂鮪已狂鯨不驕鮒已嘔箴不疫蝥不癘苾不糝  
鰓鰓禦火

陪臣執命王公望風謀始合羣下並附諸侯歸心則月  
舉足垂爪

古微書卷三十五

欽定四庫全書

古微書卷三十六

明 孫穀 編

洛書甄曜度

緯書以曜稱者凡四見曰靈曜曰文曜曰曜鉤曰  
曜嘉未有博極軌度者惟洛書所構旁蠡周天罔  
不具悉蓋星歷之學聖門所首務焉後世不第棄  
置之而且曰知星宿衣不覆率用為戒矣嗟乎士



子出其戶舉目則見天而顧不解列宿為何物也  
亦足羞矣夫天事恒象象則顯矣昭昭矣何難知  
哉人自不學耳

周天三百六十五度四分度之一夫一度為千九百三  
十二里則天地相去六十七萬八千五百里周天一百  
七萬一千里一度為二千九百三十二里七十一步二  
尺七寸四分四百八十七分分之三百六十二

推廣九道百七十一歲進退六十三分百四十四歲一

超次與天相應

按晉志周天三百六十五度五百八十九分度之百四十五半覆地上半在地下其二端謂之南極北極北極出地三十六度南極入地三十六度兩極相去一百八十二度半彊繞北極徑七十二度常見不隱謂之上規繞南極七十二度常隱不見謂之下規赤道帶天之絃去兩極各九十一度少強黃道日之析行也半在赤道外半在赤道內與赤道東交於角五

少弱西交於奎十四少強其赤道外極遠者去赤道  
二十四度斗二十一度是也其入赤道內極遠者亦  
二十四度井二十五度是也日南至在斗二十一度  
去極百一十五度少強是也陸績云天東西南北徑  
三十五萬七千里此言周三徑一也考之徑一不啻  
周三率周百四十二而徑四十五則天徑三十二萬  
九千四百一里一百二十二步二尺二寸一分七十  
一分分之十以句股法言之旁萬五千里句也立八

極萬里股也從日邪射陽城弦也以句股求弦法入  
之得八萬一千三百九十四里三十步五尺三寸六  
分天徑之半而地上去天之數也倍之得十六萬二  
千七百八十八里六十一步四尺七寸二分天徑之  
數也以周率乘之徑率約之得五十一萬三千六百  
八十七里六十八步一尺八寸二分周天之數也  
又按周髀算經周天七衡周而六間是故一衡之間  
萬九千八百三十三里三分里之一即為百步內一

衡徑二十三萬八千里周七十一萬四千里分為三百六十五度四分度之一度得一千九百五十四里二百四十七步千四百六十一分步之九百三十三

次二衡徑二十七萬七千六百六十六里二百步周八十三萬三千里分里為度度得二千二百八十里百八十八步千四百六十一分步之千三百三十二

次三衡徑三十一萬七千三百三十三里一百步周九十五萬二千里分為度度得二千六百六里百三

十步千四百六十一分步之二百七十次四衡徑三十五萬七千里周一百七萬二千里分為度度得二千九百三十二里七十一步千四百一十分步之六百六十九次五衡徑三十九萬六千六百六十六里二百步周一百一十九萬里分為度度得二千二百五十八里十二步千四百六十一分步之千六十八次六衡徑四十三萬六千三百三十三里一百步周一百三十萬九千里分為度度得三千五百八十三

里二百五十四步千四百六十一分步之六次七衡  
徑四十七萬六千里周一百四十二萬八千里分為  
度得三千九百九里一百九十五步千四百六十一  
分步之四百五周二百四十三萬里分為三百六十  
五度四分度之一度得六千六百五十二里二百九  
十三步千四百六十一分步之三百二十七過此而  
往者未之或知又曰陰陽之數日月之法十九歲為  
一章四章為一節七十六歲二十節為一遂遂千五

百二十歲二遂為一首首四千五百六十歲七首為  
一極極三萬一千九百二十歲生數皆終萬物復始  
天以更元作紀歷

甄鸞注引乾鑿度曰甲子為部首七十二歲次得癸  
卯部七十六歲次壬午部七十六歲次辛酉部七十  
六歲凡三百四歲木德也主春生次庚子部七十六  
歲次己卯部七十六歲次戊午部七十六歲次丁酉  
部七十六歲凡三百四歲金德也主秋成次丙子部



七十六歲次乙卯蔀七十六歲次甲午蔀七十六歲  
次癸酉蔀七十六歲凡三百四歲火德也主夏長次  
壬子蔀七十六歲次辛卯蔀七十六歲次庚午蔀七  
十六歲次己酉蔀七十六歲凡三百四歲水德也主  
冬藏次戊子蔀七十六歲次丁卯蔀七十六歲次丙  
午蔀七十六歲次乙酉蔀七十六歲凡三百四歲土  
德也主致養其德四正子午卯酉而朝四時焉凡一  
千五百二十歲終一紀復甲子故謂之遂也

賁居曰星紀分野之度自兩漢歷志古星經外則  
蔡邕月令皇甫世紀其分抄已縷縷矣未有及雲  
漢者偶讀唐志得僧一行兩戒之辨起乎雲漢而  
始知周天之度又古法所未盡者謹誌為殿

按僧一行曰天下山河之象存乎兩戒北戒自三危  
積石負終南地絡之陰東及太華逾河並雷首底柱  
王屋太行北抵常山之右乃東循塞垣至滅貊朝鮮  
是謂北紀所以限戎狄也南戒自岷山嶓冢負地絡

之陽東及太華連商山熊耳外方桐柏自上洛南逾  
江漢攜武當荆山至于衡陽乃東循嶺徼達東甌閩  
中是謂南紀所以限蠻夷也故星傳謂北戒為胡門  
南戒為越門河源自北紀之首循雍州北徼達華陰  
而與地絡相會並行而東至太行之曲分而東流與  
涇渭濟瀆相為表裏謂之北河江源自南紀之首循  
梁州南徼達華陽而與地絡相會並行而東及荆山  
之陽分而東流與漢水淮瀆相為表裏謂之南河故

於天象則弘農分陝為兩河之會五服諸侯在焉自  
陝而西為秦涼北紀山河之曲為晉代南紀山河之  
曲為巴蜀皆負險用武之國也自陝而東三川中岳  
為成周西距外方大伾北至于濟南至于淮東達鉅  
野為宋鄭陳蔡河內及濟之陽為鄴衛漢東濱淮水  
之陰為申隨皆四戰用丈之國也北紀之東至北河  
之北為邢趙南紀之東至南河之西為荆楚自北河  
下流南距岱山為三齊夾右碣石為北燕自南河下

流北距岱山為鄒魯南涉江淮為吳越皆負海之國  
貨殖之所阜也自河源循塞垣北東及海為戎狄自  
江源循嶺徼南東及海為蠻越觀兩河之象與雲漢  
之所始終而分野可知矣於易五月一陰生而雲漢  
潛萌于天稷之下進及井鉞間得坤維之氣陰始達於  
地上而雲漢上升始交於列宿七緯之氣通矣東井  
據百川上流故鶉首為秦蜀墟得兩戒山河之首雲  
漢達坤維右而漸升始居列宿上觜觶參伐皆直天

闕表而在河陰故實沈下流得大梁距河稍遠涉陰亦深故其分野自漳濱卻負恒山居北紀衆山之東南外接髦頭地皆河外陰國也十月陰氣進踰乾維始上達于天雲漢在營室東壁間升氣悉究與內規相接故自南正達於西正得雲漢升氣為山河上流自北正達于東正得雲漢降氣為山河下流阨訾在雲漢升降中居水行正位故其分野當中州河濟間且王良閣道由紫垣絕漢抵營室上帝離宮也內接

成周河內皆豕韋分十一月一陽生而雲漢漸降退  
及艮維始下接于地至斗建間復與列舍氣通於易  
天地始交泰象也踰析木津陰氣益降進及大辰升  
陽之氣究而雲漢沈潛東正之中故易雷出地曰豫  
龍出潛為解皆房心象也星紀得雲漢下流百川歸  
焉析木為雲漢末派山河極焉故其分野自南河下  
流窮南紀之曲東南負海為星紀自北河末派窮北  
紀之曲東北負海為析木負海者以其雲漢之陰也

唯陬訾內接紫宮在王畿河濟間降婁亥枵與山河  
首尾相遠隣顛項之墟故為中州負海之國也其地  
當南河之北北河之南界以岱宗至于東海自鶉首  
踰河戒東曰鶉火得重離正位軒轅之祇在焉其分  
野在河華之交東接祝融之墟北負河南及漢蓋寒  
燠之所均也自析木紀天漢而南曰大火得明堂升  
氣天市之都在焉其分野自鉅野岱宗西至陳留北  
負河濟南及淮皆和氣之所布也陽氣自明堂漸升



遠于龍角曰壽星龍角謂之天闕於易氣以陽決陰  
夬象也升陽進踰天闕得純乾之位故鶉尾直建已  
之月內列太微為天廷其分野自南河以負海亦純  
陽地壽星在天闕內故其分野在商亳西南淮水之  
陰北連太室之東自陽城際之亦巽維地也

洛書摘六辟

此蓋桃諸帝矣而端於茫眇之代間取其道德尤  
立者斬于六君云

孔子曰洛書摘六辟日建紀者歲也成姬倉有命在河

聖孔表雄德庶人受命握麟徵易歷曰陽紀天心

建紀者謂

夫易文六七八九之數此道成于文王聖也孔表雄著漢當興以庶人之有仁德受命為天子此謂使以獲麟為應易尤象也孔子以歷說易名曰象也今易象四篇是紀古說假借字耳 別序聖人題錄

興亡州土名號姓輔友符

言孔子將比應之而作識三十六卷

亡殷者紂

黑期火代倉精受命女正昌効紀承餘以著當

火成午部也午

為火必言火代者木精將生為之將相代上也又當為火子又使其子為木 塞水是助倉精絕殷之

象字或作之滅

闕

動效承餘以

著所當文王所出云今入元者是也

洛書錄運法

此其書亦必有闕運位蓋隱識存焉而世不聞耳

黃帝坐玄扈閣上與大司馬容光左右輔將周昌二十

二人臨觀鳳圖

一作

臨觀鳳凰之至

舜以太尉受號為天子五年二月東巡狩至於中州與

三公諸侯臨觀黃龍五采負圖出置舜前也

孔子曰昔逢氏抱小女嬉觀帝為履癸妃

一本

逢氏抱

小女妹喜帝孔甲悅之以為太子履癸妃

有人如金握天鏡

按竹書紀年癸命篇伐山民山民女子桀二人曰琬  
曰琰后愛二人女無子焉斲其名于荇華之玉荇是  
琬華是琰而棄其元妃于洛曰妹喜於傾宮飾瑤臺  
居之

述異志夏桀宮中有女子化為龍不可近俄而復為  
婦人甚麗而食人桀命為蛟妾告桀吉凶惟楚莊王  
時宮人一旦而化為野蛾飛去此為最奇

孔子河洛識

二口建戈不能方兩金相刻發神鋒空穴無主奇入中  
女子獨立又為雙

注二口建戈劉字也晉金行劉姓又金故曰兩金空  
穴奇入為寄字女加又奴字

錄運期識

九侯七傑爭民命炊骸道路誰使主者玄且來


謂劉玄德也

甄耀度識

赤三德昌九世會備合帝際

指劉備也

沙流不言小人起擅百川亂不言小人執政



古微書卷三十六